

## Objavljena nova publikacija o gornjem toku Neretve

14 January 2010

Brošura o Gornjoj Neretvi, odnosno o području gornjeg toka Neretve, izdana je krajem protekle godine od strane udruženja za zaštitu okoline Zeleni Neretva iz Konjica, a uz podršku regionalnog ureda za Bosnu i Hercegovinu njemačke Fondacije Heinrich Böll. Publikacija je još jedan pokušaj promocije ovog vrijednog prirodnog resursa kojem prijete uništenje izgradnjom visokih brana.

Obzirom da je područje Gornje Neretve decenijama zapostavljano i skrivano od očiju javnosti svaka nova publikacija koja se bavi ovim krajem je veliki dobrodošla. Publikacija je printana u dvije hiljade primjeraka te je kreirana i elektronska verzija prilagođena za slanje i objavljivanje putem weba. Ova verzija se može u pdf formatu skinuti sa stranice udruženja ([www.zeleni-neretva.ba](http://www.zeleni-neretva.ba)) čime se potiče njena dalja distribucija. Inače, korištenje obje verzije publikacije je slobodno i njena distribucija je poželjna, ali uz poštovanje autorskih prava. Brošura sadrži osnovne informacije o gornjem toku Neretve uključujući geografske i geomorfološke odrednice, hidrološke karakteristike, kao i prirodne i kulturne vrijednosti. Publikacija je ilustrovana kvalitetnim fotografijama afirmisanih autora, a priređivač brošure je Amir Varišić. Iako se udruženje Zeleni Neretva, u osnovi svog djelovanja, ne bavi promocijom turizma s vremena na vrijeme je prinuđeno vršiti ovakve i slične izdavačke aktivnosti obzirom da lokalna turistička zajednica to ne radi.